

丁文誠公奏稿

丁文誠公奏稿

卷之七目錄

太監出京招搖飭拏審辦摺

同治八年七月二十九日

拏獲私逃出京太監遵

旨正法摺

同治八年八月初七日

變通綠營兵制摺

同治八年八月二十八日

辦理私逃太監隨從人等摺

同治八年八月二十八日

長賡被訐審明請

旨摺

同治八年九月三十日

陳明長賡因公獲咎片

同日

整理綠營抽練馬兵摺

同治八年十月二十九日

遵旨辦理劉效忠片

同治八年十一月十五日

特保賢能各員摺

同治八年十二月十九日

估挑運河擇要辦理摺 同治八年十二月二十日

酌擬馬兵章程摺 同治九年二月二十九日

馬隊津貼免扣二成片 同治九年二月三十日

增建號舍添設房考摺 同治九年五月二十九日

密陳海口防務暨籌備北路情形摺 同治九年七月十九日

請優卹惠慶摺 同治九年七月三十日

馬兵章程仍照原議辦理摺 同治九年十月三十日

太監出京招搖飭拏審辦摺

同治八年七月二十九日

奏爲太監自稱奉

旨差遣招搖煽惑眞僞不辨現飭查拏審辦恭摺由驛奏聞仰祈

聖鑒事

臣

接據德州知州趙新稟稱本年七月二十日

訪聞有北來大太平船二隻小船數隻駛入州境儀衛炫赫自稱

欽差該州因無傳牌勘合又未奉文行知形迹可疑隨即派人密訪據稱係安姓太監坐船旗上大書奉旨

欽差採辦龍袍字樣兩旗上又有一小旗上畫一日形一

三足烏船之兩旁俱有龍鳳旗幟並聞船上設有龍衣一襲所帶之人舉動桀驁且女樂成隊品竹調絲兩岸觀者如堵二十一日船至橋口風聞本日是其生辰所帶男女多人均向龍衣羅拜民間頗爲震駭該州正在馳往查詢而該船業已揚帆出境南去現已飛移下站及鄰封跟蹤查訪稟請核辦等情

臣

接閱之下不勝駭異伏思我

朝

列聖相承二百餘年從不准宦官與外人交結亦未有差派太監赴各省之事實

龍袍係

御用之衣自有織造謹製儻必應採辦但須一紙

明諭該織造等立即敬謹遵行何用太監遠涉糜費且我皇太后

皇上崇尚節儉普天欽仰斷不須太監出外採辦卽或實有其事亦必有

明降

諭旨並部文傳知到臣卽該太監往返照例應有傳牌勘合亦決不能聽其任意遊行漫無稽考尤可異者龍鳳旗幟係

御用禁物若果係太監在

內廷供使自知禮法何敢違

制妄用至其出差攜帶女樂尤屬不成體制似此顯然招

搖煽惑駭人聽聞所關非淺現尙無騷擾撞騙之事而或係假冒差使或係捏詞私出眞僞不辨臣職守地方不得不截拏審辦以昭慎重現已密飭署東昌府知府程繩武暨署濟甯州知州王錫麟一體跟蹤查拏解省由臣親審請

旨遵行所有太監自稱奉

旨

欽差採辦龍袍招搖煽惑眞僞莫辨現飭查拏審辦緣由謹恭摺先行由驛四百里奏

聞伏乞

皇太后

皇上聖鑒訓示謹

奏

拏獲私逃出京太監遵

旨正法摺

同治八年八月初七日

奏爲拏獲沿途招搖煽惑之太監遵

旨正法並現在分別查辦隨從人等恭摺由驛覆奏仰祈
聖鑒事竊臣前據德州稟報有安姓太監自稱奉

旨差遣採辦龍袍乘坐船隻擅用違禁旗幟並攜帶女樂
羅拜龍衣沿途招搖煽惑等情一面先行奏

聞卽密飭沿途各州縣一體截拏在案

臣

拜摺後陸續接

據臨清東昌東阿甯陽等處先後稟報該太監船隻由德
州駛至臨清之南灣地方先期卽有前站官雇大小車二
十餘輛由直隸故城縣屬鄭家口旱路而來至彼守候船
至南灣卽換車改行陸路所帶女樂因車行不能多帶隨

開銷遣去此外僅帶婦女五人其隨從約有三十餘名均似鑣手之類由臨清東昌至汶上甯陽東平東阿一帶行走勢甚迅疾形迹可疑沿途居民頗爲驚駭等情臣因該太監隨從人衆又多係鑣手慮恐不服查拏復密飭各路巡緝武員酌帶小隊馳赴前途與地方官相機捕拏旋據署泰安縣知縣何毓福稟報該太監由甯陽折回於八月初二日行抵該縣南關經該縣將其拏獲並將隨從男女等暨車輛一併設法截留先將該太監暨跟隨三人解送來省等語臣隨提該太監至廳事親行密詢據稱姓安名得海直隸青縣人年二十六歲向充太監詰以因何出外據稱奉

旨差遣採辦龍袍復詰以既係奉

差何以並無

諭旨及傳牌勘合又何以攜帶婦女妄用禁物必屬假冒
何能狡飾該太監始猶強辯繼經臣以毫無憑據及不應
一路招搖震驚地方嚴詰形色惶恐俯首無詞自稱該死
臣復搜查其隨身所帶物件於貼身包袋內搜出紙包一
箇內有紙片二件均係干預地方公事詢係受人請託是
其假冒招搖確切無疑臣復將其跟隨三人查詢據供一
名陳玉祥一名李平安一名黃石魁均係跟隨安得海服
役本年七月內安得海聲稱奉

旨採辦龍袍帶領伊等起程實不知真偽由天津坐船攜

帶婦女多人同行至臨清地方復又換車起旱行至泰安
卽被拏獲各等語臣復飭將其隨帶衣箱開視內有龍衣
一領翡翠朝珠一挂餘均係常用物件隨卽封固並將該
太監等飭交厯城縣嚴加看管候

旨遵辦茲於初六日亥刻承准軍機大臣字寄欽奉
密諭該太監擅離遠出並有種種不法情事若不從嚴懲
辦何以肅宮禁而儆效尤著丁寶楨迅速派委幹員於所
屬地方將六品藍翎安姓太監嚴密查拏令隨從人等指
證確實毋庸審訊卽行就地正法不准任其狡飾如該太
監聞風折回直境卽著曾國藩飭屬一體嚴拏正法儻有
疏縱惟該督撫是問其隨從人等有迹近匪類者並著嚴

拏分別懲辦毋庸再行請旨等因欽此

臣

於跪讀之下仰

見

聖明獨斷欽佩難名當以安得海前經

臣

親查確實隨於

初七日卽欽遵

諭旨委兼署臬司潘爵

臣

標中軍參將緒承督同府縣將

安得海卽行正法至泰安縣截留之隨從人等並婦女車輛現已札飭一併解省俟提解到日與現在解省之親隨陳玉祥等分別辦理其衣物等項飭發藩庫存儲至龍衣一件翡翠朝珠一挂是否私造抑係竊去不辨真偽應另派弁親齋同搜出之紙片二件一併咨送軍機處查核以昭慎重所有拏獲沿途招搖煽惑之太監查驗確實業已

遵

旨就地正法並現在分別查辦隨從人等緣由恭摺由驛
覆奏伏乞

皇太后

皇上聖鑒謹

奏

變通綠營兵制摺

同治八年八月二十八日

奏爲營伍亟須整飭現擬設法變通辦理以足兵餽而收實用恭摺奏祈

聖鑒事竊維我

朝廷設各省營兵星羅碁布著爲定額年中不惜餽糈以期養一兵卽得一兵之用經制極爲精詳誠不容妄議變通然而今昔之事勢不同斯辦理之機宜亦異若昧乎窮變通久之義而第奉循故事非實事求是之道也伏查東省綠營之設統計臣標及曹兗登三鎮水陸共三十五營額設馬兵三千五百五十六名戰守兵一萬四千四百三十七名其初餽項充足誠爲得用自咸豐二年軍興以後

連年辦理防勦初則抽調營兵嗣以賊勢日紛兵不敷調遂添募勇其後又以庫項日絀每遇調兵出師一切俸賞行裝傷亡卹賞各項爲費不貲籌措無出誠不若募勇之朝甫入冊募卽衝鋒得人易而爲費省是以募勇愈多而用兵愈少募勇旣多則不能不擲兵餉以濟勇糧而兵餉遂因以不足餉不足則兵益疲積久遂歸於無用東省計自咸豐十一年起截至同治七年止每年支發兵餉以餉絀勇多之故或僅能發兩三月及四五月不等各營因欠餉過多其中凡有開除兵丁倒斃馬匹雖亦隨時募補買補而老弱疲瘦之充數者亦在所難禁此雖嚴責之各營將弁而無米爲炊實無如何此東省營伍廢弛所由來也

臣自六年三月奉

命撫東目擊時艱殊深焦灼因值防勦萬緊東西奔馳未遑兼顧且亦無款可籌更難卽時辦理上年軍務肅清卽思設法整頓本年春間晉京

陛見仰蒙

皇太后

皇上垂詢營務

臣

謹將饒項支絀籌辦爲難各情據實面

陳復蒙

優加訓示認真操練

臣

具有天良敢不殫竭駑駘力圖報

稱惟思練兵之法大要不外選兵與籌餉兩端核實辦理而已而其中緩急機宜當兵缺餉足之時則重在足兵不

足兵則缺額適所以耗饗而值兵多饗絀之際則重在足饗不足饗則枵腹亦難以養兵現在東省事務殆非選兵之難而籌饗之難蓋以軍務初平民氣未復災緩迭報征收已屬不易加以京協各饗及留防各營用款猶多司庫入不敷出時形掣肘以此日情形而論兵饗萬難全支然既欲練兵自必先將各營疲弱之衆悉數開除而後可期有用又必將開除之兵挑補足額而後可符舊章辦理誠爲合法但恐挑補一經足額而饗項或有不敷則今日選補之兵久之仍轉爲疲弱是以無饗而虛負足額之名轉以足額而實受無饗之累此雖日言練兵而卒不收一兵之效初非計之得也

臣

竊以爲今日之練兵亟在開除疲

弱而募補足額之議則在所宜緩蓋以今日之籌撥艱難與其開除之後必求募補足額而餽不足濟使足額之兵其無用與缺額者等曷若設法變通裁去疲弱而專留精壯不必限以募補但令就年中實發之餽養年中得力之兵始之日日操演餽不匱則兵日強習之既久精益求精在定制雖爲缺額較之足額而無餽者其得用不啻倍蓰似於立法之初所謂兵不虛設而餽不虛糜者亦爲符合

臣自跪聆

聖訓後日夜思維籌之累月似覺舍此而言練兵別無著手之處因於回任後嚴飭各營將備將出師撤回以及在營之老弱各兵與夫技藝難造者據實呈報復委中軍參

將緒承右營遊擊王秀分赴東西兩路逐加較閱悉數開
除暫緩募補飭令各營先就現存之實在兵數支饒勤加
操練務使營無弱兵兵無虛饒茲據各該營先後呈報共
開除馬兵九十六名戰守兵一千八百七十二名計實存
馬兵三千四百六十名戰守兵一萬二千五百六十五名
均皆年力強壯可期操練臣已檄飭藩司於發月饒時按
各營實存兵數支放其暫時開除之兵額饒銀仍扣存司
庫以實饒發實兵俟將現在之兵操練成熟後再爲查看
情形如庫項稍充兵饒可期足額再飭將開除缺額之兵
選挑精壯募補足數以符定制至各營兵丁既將老弱開
除核實給饒則各營馬匹亦應查明變通辦理以歸一律

辦理私逃太監隨從人等摺

同治八年八月二十八日

奏爲遵

旨審明私逃安姓太監之隨從人等分別辦理恭摺具奏
仰祈

聖鑒事竊臣前因私逃之太監安得海沿途招搖煽惑當
經具摺由驛奏

聞一面通飭截拏據泰安縣將安得海並隨從男女人等
暨車輛輜重一併盤獲先將安得海並跟隨之陳玉祥李
平安黃石魁解省經臣訊明安得海帶同陳玉祥等私逃
外出假稱奉

旨採辦龍袍沿途招搖煽惑屬實正在具奏間欽奉

諭旨著丁寶楨迅速派委幹員將六品藍翎安姓太監嚴密查拏令隨從人等指證確實毋庸審訊卽行就地正法不准任其狡飾其隨從人等有迹近匪類者並著嚴拏分別懲辦等因欽此臣因安得海業經臣查驗確實當卽遵旨正法並委員馳赴泰安將截獲之隨從人等解省訊辦一面先將辦理情形由驛覆奏並將起獲之龍衣一襲翡翠朝珠一挂及搜獲隨身之紙片二件委弁送交軍機處查收旋據委員將泰安縣截獲之隨從男女人等並旗幟車馬金銀珠玉衣物同陳玉祥等三犯共六十八名口一併飭發濟南府等確審據濟南府知府龔易圖等審明錄供由兼署臬司潘蔚解勘臣正在提審間復欽奉

上諭安得海既經正法其隨從之陳玉祥李平安二名亦係太監均著卽行絞決此外尙有太監幾人著丁寶楨於訊明後一併絞決以儆效尤其餘隨從人等迹近匪類者卽懷遵前旨分別懲辦至黃石魁一名係何人役摺內所稱前站官究係何官抑係冒充並著訊明辦理安得海衣物等項毋庸存儲藩庫卽由該撫派員解交內務府查收等因欽此

臣遵卽提訊陳玉祥等六十八名口據供緣陳玉祥李平安李得喜郝長瑞李順計得壽俱係太監在

內廷當差黃石魁田兒俱受雇在安得海家服役多年經管安得海一切事務韓寶清戴登雲何林芝高振邦劉鳳喜俱一向充當鑣手同治八年七月初三日已獲正法之

考和卷一
六品藍翎太監安得海聲言奉

旨出京赴蘇州採辦龍袍令陳玉祥李平安李得喜郝長
瑞李順計得壽黃石魁田兒與在內充當蘇拉之金安言
劉文瑞劉凱黃喜並金安言名下服役之張瑞跟從同行
陳玉祥等不知真僞因素聽安得海管束指揮不敢不從
安得海又帶胞叔安邦太並價買隨身服侍之安馬氏暨
族弟安三胞妹洛二胞姪女拉仔及在家服役之婦女徐
王氏袁姚氏於初六日由京起程黃石魁田兒爲其雇覓
輦太郭三李升孫大高大陳二韓大王六劉五方四宋九
姚祥溫三趙文濱吳二孫三趙二戴四姜海張二白三馮
套李三慶三李順來等服役趕車由通州雇船南行並雇

覓韓寶清戴登雲何林芝高振邦劉鳳喜五人保鑣每人付給身價銀二百兩船上插起奉

旨

欽差採辦龍袍大旗並插一日形三足烏的旗船內安設龍袍沿途雇覓婦女唱曲取樂路經天津安得海赴天齊廟遊玩與僧濱文言談投機帶領同行是月二十一日船抵山東德州地方安得海稱係生辰將龍衣排設陳玉祥等都向安得海羅拜並雇覓妓女設宴作樂嗣船由德州駛抵臨清州地方因河水淺阻安得海意欲起旱黃石魁田兒係假充前站官沿途雇覓車輛等候即時棄船換車起旱南行一路遇有人盤問韓寶清等五人卽上前肆行

恐嚇並假作欲行查拏形狀居民頗爲驚駭迨行抵泰安縣地方卽被截拏其沿途受雇船戶車夫剃頭修腳鼓吹談書及搭伴同行之張福張大方月魏小劉明段李三趙廷亮張兒趙慶普楊二齊五張德王階平劉同意沈九汝李大周云亦被一併截留嚴詰各供矢口不移並無別故查陳玉祥李平安李得喜郝長瑞李順計得壽六名均係太監跟隨私逃當卽遵

旨飭委濟南府知府龔易圖等會同營汛鄉赴市曹一併絞決黃石魁田兒均在安得海家服役多年經營一切事務安得海之種種妄爲皆由該二犯助惡所致且敢假充前站官招搖厥罪甚重韓寶清戴登雲何林芝高振邦劉

鳳喜等向係充當鑛手本非安分之輩此次既知安得海私逃率卽受雇同行保鑣沿途用言向人恐嚇並欲混拏以致居民驚駭其倚勢妄爲情罪亦重而察看該五犯舉動桀驁面目獷惡誠爲迹近匪類黃石魁田兒韓寶清戴登雲何林芝高振邦劉鳳喜七犯未便姑容致令別生事端臣於審明後當飭濟南府等一併綁赴市曹正法至金安言劉文瑞劉凱黃喜雖均訊無隨從撞騙情事惟均係蘇拉張瑞係跟蘇拉服役之人俱應守法乃敢聽從安得海私逃外出亦屬不安本分僧濱文不守清規跟隨安得海同行且與之往來甚密幫同取樂實屬無知妄爲安邦太係安得海胞叔不能管教伊姪輒與同行出外任聽妄

爲尤出情理之外安馬氏係安得海價買隨身服侍婦女
罪有應得均未便容留內地致滋他事金安言劉文瑞劉
凱黃喜張瑞僧濱文安邦太安馬氏八名口一併發往黑
龍江給披甲人爲奴至鞏大郭三李升孫大高大陳二韓
大王六劉五方四宋九姚祥溫三趙文濱吳二孫三趙二
戴四姜海張二白三馮套李三慶三李順來徐王氏袁姚
氏二十七名口均訊係出京時始行受雇服役趕車爲時
甚暫一事不知應與年幼無知安三洛二拉仔三名口一
併於訊明後分別遞回各原籍交地方嚴行管束不准復
行出外滋事其餘張福等十七名或訊係受雇之船戶車
夫及剃頭修腳鼓吹談書人等或訊係搭伴隨從同行均

屬無干應卽一併保釋除將起獲之旗幟車馬金銀珠玉衣物分別造冊飭委候補直隸州知州文敬候補知縣麟盛解交內務府查收並將供冊咨送軍機處刑部備查外所有遵

旨分別辦理緣由理合恭摺具奏伏乞

皇太后

皇上聖鑒訓示謹

奏

長廣被訐審明請

旨摺

同治八年九月三十日

奏爲審明道員被所屬知府稟訐非刑斃命實情恭摺覆
奏仰祈

聖鑒事竊照前據兗州府知府沈錫慶稟訐兗沂曹濟道
長廣連斃李三等九命經前護撫臣文彬飭委候補道王
成謙前往查明稟覆李三等五命係拏獲隨捻焚掠匪犯
長廣於訊明後照章正法卞衍運等四名均係府役轎夫
地保長廣因其開場聚賭招集匪類不服責處飭勇重責
以致斃命等情文彬因核與沈錫慶所稟大相懸殊一面
行司分別委員馳往覆查驗訊一面奏請將長廣沈錫慶
解任聽候查辦欽奉

上諭府署轎班房開場聚賭容留匪類何以該管知府毫無覺察稟內亦無一字提及是否有心隱飾在官人役設局誘賭亟應按律懲辦長賡有無任用非刑均應澈底根究長賡沈錫慶著一併解任卽著丁寶楨提同人證卷宗嚴審確情據實具奏毋稍徇隱等因欽此遵卽分別委員前往接署將長賡沈錫慶調省行司委提案內應質人卷至省審辦並據委員候補知府董紹昌等驗明卞衍運等傷痕填格呈送候補知州陳嗣良查覆與王成謙所稟無異據臬司李元華會同藩司文彬審明錄供解勘前來臣親提研鞫緣長賡係正黃旗內務府漢軍松齡佐領下人由舉人知縣揀發山東委署蘭山縣知縣

簡放沂州府知府奉

旨補授兗沂曹濟道同治七年三月初三日到任臣因兗沂曹濟等屬素爲盜賊淵藪伏莽未淨劄飭帶勇搜辦餘匪沈錫慶籍隸江蘇通州由進士改翰林院庶吉士散館授職編修

簡放兗州府知府同治六年十月初八日到任八年正月間鄒縣知縣章澍督同署典史候補州吏目黃汝志拏獲賊犯劉吉訊認聽從逸犯王麻仔夥同高虎鄭雪李三結夥迭竊移會濟甯曲阜等州縣營汛將王麻仔高虎鄭雪先後拏獲旋經長賡訪查該犯等俱有隨捻焚掠之案行提各犯至道並訪聞府役卞衍運等有開場聚賭情事正

在密查間適黃汝志卹事回究訪知李三在府前大街擺攤賣藥稟知滋陽縣飭役隨同營兵將李三拏獲解經長賡提集各犯訊明王麻仔劉吉高虎鄭雪李三於南捻任賴大股北犯時曾經約會投入捻內隨同焚掠嗣因匪勢日蹙各自乘間逃逸七年冬間彼此會遇王麻仔糾允劉吉等迭竊鄒縣不知姓名事主銀兩並究出李三曾在府署轎班房潤迹賭博藉探消息卽於二月初二日將王麻仔等五犯一併就地正法梟示因賭爲盜數除盜源必先禁賭隨帶隊勇督率營縣兵役親赴府署轎夫班房將聚賭之卞衍運王士元李振生卽李三麻並到場同賭之趙林祥趙興義張繼合及在內間逛未經同賭之項勤業等

八名一併拏獲並起獲賭具等物又究出地保郭先亦係同夥開賭之人飭役捕獲帶回道署卽在署前對衆提訊卞衍運等供認恃係府署夫役地保且在轎夫班房兵役不敢過問是以敢於招集匪類公然聚賭長廣當將同賭之趙林祥等三名及在場未賭之項勤業等八名同賭具一併發交滋陽縣知縣彭惠高訊供分別枷責保釋並將聚賭之卞衍運等四名飭令隊勇楊履坦李宗林鄧玉劉得勝棍責示懲並令李清彥韓福升陳秉張登魁幫同撿按詎卞衍運等大肆咆哮不但不服撿按且在地掙扎亂滾長廣因卞衍運等恃役抗違飭令該隊勇等重責李清彥韓福升陳秉張登魁等因撿按不住與劉德勝各自走

開楊履坦等用棍重責以致卞衍運等因傷斃命沈錫慶
因傳聞本道署前連斃九命不知所訊何供所犯何罪且
有府署夫役三名在內當卽據稟旋據屍親卞郭氏等以
卞衍運等在轎夫班房伺候地保郭先在家患病忽被本
道帶隊拏去用棍責斃赴府具呈復據情轉稟提審供悉
前情詰無起衅別故亦非挾嫌逞忿致斃應卽擬結查此
案兇沂曹濟道長廣因訪聞該管知府人役卞衍運在轎
夫班房招集匪類開場聚賭督隊拏獲飭勇對衆棍責係
爲懲治在官人役不法起見雖該隊勇楊履坦等毆責卞
衍運等斃命由於卞衍運等不服挨按在地掙扎亂滾所
致惟所用之木棍係軍營帶勇所用並非例設刑具究屬

違例咎有應得但責斃所屬人役事屬因公詰無挾嫌逞忿情事兗州府知府沈錫慶所稟各情雖非有心隱飾惟於府役轎夫地保在府署轎夫班房開場聚賭未能先事查拏已屬毫無覺察迨該管道員訪聞獲辦該府近與同城既不立時前往隨同訊辦事後又不詳細查明原委輒含糊其詞具稟尤屬非是相應請

旨將兗沂曹濟道長賡兗州府知府沈錫慶一併革職留任以示懲儆隊勇楊履坦等飭司照律擬議與已獲正法之王麻仔等五犯分敘供招另行詳咨候補吏目黃汝志訪知匪犯李三蹤迹稟縣拏獲並無不合應毋庸議除供冊咨部外理合恭摺覆陳伏乞

皇太后

皇上聖鑒訓示謹

奏

陳明長廣因公獲咎片

同治八年九月三十日

再究沂曹濟道長廣非刑責斃府役人等一案業經臣審明實情覆奏將長廣沈錫慶議以革職留任請

旨辦理在案查此案長廣飭令隊勇將卞衍運等棍責該勇等所用之木棍係屬軍營常用並非例設刑具但責斃之卞衍運等均屬府役轎夫地保以在官人役明目張膽在於公署開場聚賭實屬肆無忌憚迨經該道拏獲責懲復敢不服責處大肆咆哮欺尊藐玩尤爲法所難容此等不法之夫役若再稍涉寬縱易啟胥役刁惡之漸況兗州賭風之熾與兗屬差役之橫均爲人所共知臣年來屢飭長廣認真懲治以安良懦而清盜源該員疾惡過嚴又復

任勞任怨遂致因公獲咎若使當時稍徇情面斷不肯爲是其居心行事專爲整頓地方實可共諒且查長廣於前撫臣譚廷襄揀委蘭山縣時沂州一府徧地皆賊郡城以內居民署役無不與賊通者情形岌岌已至不可收拾自該員到任後不顧險難力除內奸繼復埽除外匪擒斬巨逆數十名地方漸有轉機是以該員在任丁憂奏請奪情留任誠以該府不可無此人也嗣奉

簡放沂州府復奉

旨升授兗沂曹濟道數年以來江東兩省連界著名匪首芟除不下五百餘名均經前撫臣及臣歷次奏報有案現在沂州一屬民情又安皆係該員之力邇來沂屬各州縣

有因公晉省來見者臣詳詢地方情形咸謂該員此次解任沂屬及江南徐屬各州縣官民若失長城且鄉間不逞之徒聞有私相喜幸者是長賡在沂聲威素著賊畏民懷實爲東省必不可少之員茲因責斃在官不法人役以致獲咎固爲可惜且恐各署惡蠹相率膽玩由此漸長刁風地方難期整飭臣再四思維惟有仰懇天恩俯念該員充沂曹濟道長賡力除惡習不避嫌怨因公獲咎情本可原

准如臣所請予以革職留任俾該員益勇於治事可以收久安之效實於地方大有裨益臣爲邊方緊要人才難得起見用敢不揣冒昧據實附片陳明伏乞

聖鑒訓示謹

奏

整理綠營抽練馬兵摺

同治八年十月二十九日

奏爲謹將綠營酌量整理並開除馬匹抽練馬兵酌加津貼饒乾各情形恭摺覆陳仰祈

聖鑒事竊臣前將東省營務應須整飭各情具奏於九月初七日欽奉

諭旨飭將如何訓練之處妥議章程奏明辦理等因欽此仰見

聖慮閎遠欽感莫名臣維綠營廢弛日久其驟難整飭情形初非一端竊情之弁領坐養官氣羸散之兵丁別理生業八九年來每歲饒項發給甚少以至旗幟器械亦極缺乏舊制各營哨分防地方所在名數畸零勢分形散一時

欲加整頓殊乏握要之策然經制久遠旣難驟議更改惟於因循舊制之中斟酌辦理勤加訓練以期聯合片段臣前已將各營兵丁裁汰老弱核除虛數現在所存兵丁不敢謂其盡屬可用然較往時已稍核實臣現擬定陣式分散各營令均就本汛自爲操練每月合操兩次令各汛弁均帶所部兵丁詣本營會操悉照所授陣式演習至結隊之法擊刺之藝皆參用勇營之制以期適時而切用如此辦理稍使各營兵服習營伍之勤勞熟聯將士之氣誼諳知旗鼓之節度規模或冀漸復臣每於接見各將弁時必勤加訓勉務使汰去羸弱挑選強壯來年如獲豐稔庫款稍裕餽項亦須酌議增發器械亦須逐漸購備當此廢壞

過甚之時雖使改易舊章亦難驟成勁旅今臣不再繁立
科條但期修補破敗力加整理漸以歲月之久持以訓察
之勤各標營中或漸有改觀之處至北方情形馬隊尤屬
緊要而練之尤難得力應須片編隊伍以資操練不使雜
於各營哨步兵之中庶臨敵不致溷亂臣現將綠營馬匹
從實查驗通計東省出師遺失及歷年倒斃滿椿未經買
補並現在疲病變價各馬匹開除二千零二十一匹已飭
將乾銀扣存司庫並遵照前奏暫緩買補其馬兵之疲弱
者亦卽隨時開除強壯者存留令其隨同練習槍矛俟將
來買馬時再行發給刻計實存馬匹共一千五百三十餘
匹現擬就各營中抽選七百五十名分爲三營以二百五

十名爲一營每營五哨每哨五隊每隊十人另選將領分帶操練以期適於實用惟舊章餵乾各營本從儉薄人馬均嫌不敷既經抽練則均宜酌加津貼茲議於月領餵乾外每兵酌加餵銀一兩二錢每馬酌加乾銀二兩一錢俾士馬飽騰庶可責以操練至此項津貼無他款可以籌辦惟有於釐金項下核實經理除本年撥解固本軍餉外如稍有贏餘卽以之照數發給第東省釐金收數甚微設贏餘之項不敷支給應須另行籌畫不准動用正款以示撙節惟臣現擬籌辦各軍均擇要酌量試行將來有無成效尙未能確有把握亦惟督飭各營認真妥辦以期稍盡厥職除將開除馬匹各情另行咨部查辦外謹將酌量整理

緣營並開除馬匹抽練馬兵酌議津貼各緣由恭摺覆奏
伏乞

皇太后

皇上聖鑒訓示謹

奏

遵旨辦理劉效忠片

同治八年十一月十五日

再臣前欽奉

諭旨以已革提督劉效忠解回原籍後令臣隨時留心如仍不安本分卽著設法辦理毋稍姑息等因臣當將該革員從前叛逆罪狀並候到籍後妥爲辦理各情具奏在案查劉效忠卽劉占考初充捕役繼爲竊盜後復叛逆直東豫三省邊境受其荼毒慘不可言從前未加懲創率行招撫並令帶領逆衆赴陝實屬敷衍了局迄今曹屬被害紳民憤恨填胸而該革員強暴性成聞其言語往來從無分毫悔罪之意此次解回東省臣深慮隱滋事端當於奉旨後卽函致陝西撫臣穩慎押解一面密遣心腹赴陝沿

途跟蹤偕行窺其舉動以便設法箝制十月中旬曹屬各村莊聞其回籍之信各懷疑懼一日數驚而昔日從逆之徒仍復大造謠言羣相勾聚爲出境迎接之舉臣於聞信後卽密飭濮州知州葛恩榮等於曹濮邊界妥爲鎮壓杜其邀結並飭沿途各州縣小心押送茲於十一月初三日解至甯陽臣適於途次相遇傳見之下察其目動言肆野性未馴及告以遞籍管束之由竟敢出言無忌怨懟

君上臣當卽大加申斥適署兗沂曹濟道王成謙來見卽交其先行押至濟甯看管初四日臣到濟甯據王成謙面稟該革員到濟執意住居關外不肯入城經該道再三飭諭始隨入城復令其照例至州署暫住乃大肆咆哮抗不

願往又爲之覓一住宅以便看管亦抗不肯願實屬難於
管束臣復傳詢陝西押送之弁及前派跟蹤之人據稱該
革員一路強橫所過州縣信口謾罵每於派送人役輒以
洋槍轟擊均係該弁曲爲排解幸得無事並於到豫時逐
日派人至曹州各處查探情形等語臣復飭濟甯州知州
王錫麟選派幹役密查其寓中來往人等是否良善或多
或寡據稟初五日一日之間往來該革員寓所者已不下
一百二十餘人皆係濮范鄆城水套一帶無賴之輩從前
卽其黨與其見面時狂呼跳躍肆無忌憚查其情形殊爲
叵測又據濮州知州葛恩榮於是日二更後星馳來見面
稟濮范各屬受害之家聞其回籍人心惶懼卽欲紛紛赴

省懇請誅殛以伸冤憤各等語臣查劉效忠爲山東首亂之人罪大惡極本不可以招撫從前倖逃顯戮已爲萬幸今日奉

旨遞籍管束亟應安分悔罪乃查其由陝至東一路橫暴自如略無儆懼初見臣時竟敢妄言怨懟實已罪不容誅至其到濟甯後種種違抗不遵約束甫入東境一日之間黨與漸聚似此豺狼成性多留一日則多一日之句結卽多一日之隱憂且其黨與猶存尤恐稍縱卽逝日後辦理轉費周章臣當將該革員提至歷數其罪欽遵

諭旨將其綁赴市曹正法以伸

國典而定人心其弟已保副將劉占克與之偕行從前亦

係隨同叛逆殘暴衆著其家屬人等均屬逆類縱之亦貽後患自應久牢監固以絕根株臣已分飭濟甯厯城荷澤等州縣鎖拏辦理惟查劉效忠親生二子一名劉維清已捐同知一名劉維恆已捐主事均應請

旨與已保副將劉占克一併革職以便永遠監禁不准釋放永除後患至劉效忠等財產大半係作亂時擄掠所得查其從前謀逆首破濮州至今城池尙未修復應請將其財產悉數查抄入官發給濮州以作將來辦理城工之用臣於劉效忠正法後卽厯揭其罪出示通諭曹屬及遠近士民均皆歡聲踴躍以爲大患已除人心極爲安帖足慰聖懷所有劉效忠到籍後狂悖無忌將其正法及將該家

屬財產分別辦理各緣由謹附片具陳伏乞

聖鑒訓示謹

奏

特保賢能各員摺

同治八年十二月十九日

奏爲遵

旨特保賢能之知府州縣開單臚陳政蹟敬備

採用並懇

恩先行降

旨褒美以勵吏治恭摺仰祈

聖鑒事竊

臣惟吏治亟須講求蒙

朝廷屢降

諭旨飭各直省督撫悉心察度酌保賢員本年六月重奉

明諭仰見

聖謨闓達於官人安民之義

垂念至深曷任欽感

臣

查州縣最爲要職不得其人則上

下交受其病而州縣應辦事宜聽斷緝捕催科三者實居

其大端苟廉謹自持能於此三事實力修舉不爲粉飾阿

好之行卽爲良吏之選

臣

每接見僚屬推誠規導勉以立

身奉公之義其有居官無狀欺僞廢弛均經

臣

隨時考核

立予參劾其餘才力尙堪造就居心近於樸茂者亦尙有

人

臣

當加意訓迪相期日進於善茲查有濟南府知府龔

易圖高唐州知州帥嵩齡厯城縣知縣孫善述章邱縣知

縣蔣慶第蓬萊縣知縣沈九齡卽墨縣知縣林溥高密縣

知縣周麟章等七員或廉靖居職勤篤匪懈或強敏過人

任事勇往才質不必盡同居官皆有實蹟足爲通省循良

之選謹將該員等歷官政蹟開具清單恭呈

御覽以備

採用並請援照今春直隸督臣曾國藩保舉地方各員之

例懇

恩宣

諭褒美仍請

旨暫免其調取引

見俾地方無更代之煩而賢能之員得以盡心民事則一
官一邑克盡厥職邀蒙

朝廷褒異華袞之榮無與爲比而

聖主敦尚吏治之意所以風示有官者倍覺深至不勝幸

甚謹將遵

旨特保賢能各員開單臚陳政蹟敬備

採用並懇

恩先行降

旨褒美以勵吏治各緣由恭摺具奏伏乞

皇太后

皇上聖鑒訓示謹

奏

謹將特保東省賢能各員政蹟開列清單敬呈

御覽

鹽運使銜道員用濟南府知府龔易圖

查該員明達過人操行端謹久歷營務熟悉戎機歷任東昌濟南各府正己率屬不事依阿整飭地方寬猛得宜事皆修舉洵屬才具幹練氣局深遠體用兼備之員

知府用候補同知直隸州知州高唐州知州帥嵩齡

查該員在東省獨行自守不涉奔競所至有聲前任臨邑鎮服強團推誠相與民多感服嗣任惠民高唐辦公勤懇而聽斷明允征解清晰歷任均各一轍洵爲操行端正才具篤實之員

知府用候補同知直隸州知州歷城縣知縣孫善述

查該員在東歷署各缺均有政聲任冠縣六年以教匪充斥之區捕賊安良不遺餘力民俗爲之大變而催科聽斷亦極勤能現任歷城懲奸除蠹力破從前積習現在訟獄清簡奸宄畏懾民情極爲愛戴洵爲精明強健才具開展之員

候補同知直隸州知州蓬萊縣知縣彭九齡

查該員前署黃縣廉靜自持聽斷勤敏署中幕友丁役馭以嚴峻弊絕風清邑民感其清苦願集貲以助公用該員屬詞拒絕士民益敬愛之謂爲百餘年第一好官現任蓬萊詞訟一無積壓錢糧首先全完而去惡安良闡境清肅

洵爲廉明奮發爲守兼優之員

知府用候補知州章邱縣知縣蔣慶第

查該員從前服官東省頗礪廉隅此次回東先任博平清
慎持躬整飭地方克盡厥職現任章邱錢漕詞訟極爲繁
難該員聽斷勤明征解清楚故民少冤抑共樂輸將闔境
愛戴輿論翕然洵爲品誼端方殫心職守之員

知府銜候補同知直隸州知州卽墨縣知縣林溥

查該員性情質實淡泊寡營前任高密撫綏百姓極爲安
帖現任卽墨訟獄簡靜征解清楚而辦理公事不弛不擾
民甚安之洵爲謹飭自好黽勉盡職之員

候補同知直隸州知州高密縣知縣周麟章

查該員心地清白不尙浮華而辦事精細極有條理現任
高密盡心民事勞苦與同聽訟務以情理論導斷結勤明
民甚戴之征解年清年款毫不挪移洵爲實心爲民志行
堅定之員

估挑運河擇要辦理摺

同治八年十二月二十日

奏爲籌辦河運估挑張秋南北淤墊運河分別擇要辦理以期妥速各情形恭摺仰祈

聖鑒事竊查前准戶部來咨奏奉

諭旨試行河運籌辦運道一案經河

臣

蘇廷樾將籌堵蘭

儀決口及查勘汶泗衛各河情形會議覆奏在案茲接部咨以核覆兩江總督馬新貽奏遵籌江北新漕河運事宜

請

飭下山東巡撫河道總督趕將河道設法挑濬毋致臨事

周章其濟甯一帶雇船接運事宜並請

飭下山東巡撫飭屬預爲布置奉

旨依議欽此咨會到

臣

查漕運故道由內河直達

京師爲數百年經營良法近雖兼用海運而河運未可偏廢惟以黃河自蘭儀決口由東省穿運以來將北流之汶水挾而東去致張秋以北之運河僅賴黃水分灌濟運淤墊日久河身遂致斷流同治四五兩年曾經試運採買米石及起運江北漕糧皆先期籌款將入運河口估挑比米船渡黃抵口猶以水小守候仍俟汛期大至乃能灌入行駛其時河口尙在南壩頭距張秋甚近年來黃水稍向南移又改至八里廟迤北入運因上游大溜在鄆壽境內穿過趙王河東岸者數處並將安山北至沈家口之運河兩岸亦多衝缺水勢愈形散漫故八里廟之溜益覺微弱

臣

前於四月間曾委員赴荷濮以下漫水所經及黃運交匯之處確切查勘並將籌堵趙王河缺口附片具陳固爲拯救災區亦欲保護運道且欲使黃水專力北注八里廟庶穿運正溜不致再有變更並擬略用置隄束水之法就現有民埝加高培厚以資捍禦無奈黃水溜急勢猛非人力可以與爭又以道里縣長工程浩大官辦民捐均屬不易而上游束水下游益致泛濫爲害更不可勝言是以未敢輕舉竊計黃水穿運已十餘年運河受病實深此時若通盤修整不但需費過鉅而黃水變遷無常實屬毫無把握現在欲行河運亦惟有因勢利導隨宜變通縱不惜多費工力仍必在大汎之時始得暢行查現在黃水入運以八

里廟爲咽喉該處現有攔門灘積淤較厚自應挑挖寬深使水勢得以暢注卽附近一二十里之河身受淤益重且爲行溜之始亦宜實力加挑自此而北其受淤有遠近之分則估挑有深淺之別卽可以次遞減臣特片派委員於東阿之八里廟起向北逐一勘丈由陽穀聊城堂邑博平清平直至臨清州交界止計程二百十餘里茲據開呈清冊共計估挑土六十餘萬方正在酌核分派適接河臣蘇廷樞來函以張秋一帶河身本年經駐紮該處之銘字各營挑挖運糧擬仍商令該軍勇丁興挑並擬酌撥津貼工竣仍歸河工造報等因臣當卽函致統領銘軍臬司劉盛藻商辦旋據覆稱願督率勇丁任挑擬將東阿境內之十

五里並酌撥陽穀境相近之八里併歸該軍按營派分段落其餘各縣境河身卽責成該地方官按照估定丈尺實力挖挑毋得草率偷減均定於來年正月中開工限於三月半前一律完竣由臣隨時嚴查督催以昭核實而期迅速其沈家口以南應行擇要挑修工程仍飭運河道籌節趕辦惟本年東省夏秋疊旱二麥多未種齊現在節逾小寒各屬得雪甚少來年司庫收數必形支絀所有前項挑河工需卽竭力籌措不過能撥銀六七萬兩今北路土方雖經約估而南路工程尙無定數應俟運河道估報到日容臣酌核再與河臣會商儘將此數勻撥核減較緩之處實辦最要之工總期不誤漕行亦不致多糜工費是卽目

前補救之正策竊見此次部議詳切仰荷

宸廑臣身任地方責無旁貸但能稍竭心力斷不敢畏難

苟安雖明知挑工不足敵淤仍當務盡人事是以張秋以北一帶河身並爲估挑較前兩屆之僅挑口門實欲倍求順利儻計米船抵東渡黃約在四五月間其時距伏汎非遠屆時若得汎水漲發總可浮送重運至船隻能否回空實不敢預必若米船前幫早到而在後未能跟蹤或隨時渡黃入運或俟齊集後一併放行亦須臨時體察情形斟酌辦理緣黃水初長每係旋長旋消水退沙留卽有挂淤阻口之患且新淤稀嫩欲挑亦無可施功惟盛漲之數十日水勢有長無消則其力自能衝刷無虞膠淺皆不得不

預爲議及此外雇船接剝等事

臣

現已飭令東昌陽穀東

阿各屬預爲辦理惟歷考黃運交流斷無兩全之勢而借黃濟運萬無能久之理今東省之運河實兼受此二病欲於此際設法經漕豈有善策前次部臣籌議治黃之道以挽淮徐故道爲上策特以事繁費重必須預爲運籌若如河臣會奏摺內所陳分年分省籌款徐辦之說部臣通盤籌畫能定斯議則東省力所能任雖竭厯所不敢辭蓋古今無不治之河河治則諸事皆易爲力以視現在歲費十數萬金名曰補苴實同虛擲者其得失較然可見此則黃運交病之實在情形區區愚忱所日爲鰓鰓過慮也所有籌辦河運估挑張秋南北河身據情分別辦理各緣由謹

恭摺具陳伏乞

皇太后

皇上聖鑒訓示謹

奏

酌擬馬兵章程摺

同治九年二月二十九日

奏爲東省抽練綠營馬兵應給營哨官弁薪水公費及軍裝車價等款仿照直隸練軍章程酌減定擬敬繕清單恭摺仰祈

聖鑒事

臣

於上年十月二十九日將東省綠營開除馬

匹暨抽調馬兵分營操練酌加津貼懷乾各情具奏十一月十八日奉

旨該部議奏欽此欽遵在案

臣

於具奏後當將各營馬兵

詳加挑選共抽得精壯五百名分爲兩營按照議定營制調集省垣授以陣法勤加訓練由臣就近自行查察其弁兵之勤惰隨時賞罰尙無墜蔽粉飾之弊惟臣前奏僅議

給兵丁饗乾津貼其餘營中一切必需用款尙未籌及茲
悉心覈議並仿照直隸練兵章程斟酌詳盡以期實效查
練馬隊之法練人尤在練馬善練馬者晝則調習馳步夜
則謹視芻豆一夜凡四五起是以馬隊兵丁旣須操演技
藝又須餵養馬匹日不暇給況遇出隊巡查則日間或馳
逐百數十里歸營之後人困馬乏若復責以自行樵汲炊
爨必致顧此失彼臣擬仿照直軍章程每哨五十人給以
餘丁六名專爲正兵看棚執爨之用庶兵丁得以專心練
習冀可漸成勁旅至練兵旣分立營制卽須慎選營官而
營官總理一營事繁責重若事事皆責其經理或恐有竭
蹶之虞臣擬仿照直隸章程請每營設正營官一員外添

派幫帶官一員協理營務文案委員一員專管文報俱專責成並照章於每營官幫帶哨弁各員均酌量給以親兵餘丁以資彈壓差遣之用此外尙有獸醫匠役人等實爲馬隊必不可少均須酌量雇募其應給薪水工食等項亦照直軍章程酌減定議以期撙節又查直隸章程內有每營每月支給公費銀六十兩一節原因營中馬匹有修補鞍韉採買藥餌及每夜應需油燭等費營官勢難賠墊所以酌量支給庶營官等不敢以公事藉口剋派兵丁此次東省事同一律亦擬仿照此數按月支給用示體恤而杜弊端其餘軍火器械爲行軍要需應由臣隨時酌量製造核實報銷惟須預養長車以供運送蓋軍行期於迅速若

俟臨時雇用或值車輛短缺誠恐有誤機宜而兵丁乘騎
又難重負以傷馬力餘丁攜帶纓具衣糧亦難分力轉運
是以直隸練兵章程有奏定長車二百輛一款今擬從減
定擬每哨五十人給與長車一輛以供轉運軍火之用計
每營長車不過五輛而有備無患自無臨時掣肘之虞以
上各項餉銀均係詳細酌核悉照直軍奏定章程從減定
擬略無分毫浮冒除兵丁應領底餉乾銀仍由藩庫支領
造報外其餘餉項均請在釐金項下動支如有不敷月行
籌款不准動支正項錢糧俾有限制其未盡事宜容臣隨
時察核具奏所有擬議抽練綠營馬兵仿照直隸定章酌
給營哨官弁兵丁餉銀及軍裝車價章程各緣由敬繕清

單恭呈

御覽謹恭摺具陳伏乞

皇太后

皇上聖鑒訓示謹

奏

謹將東省新練馬隊官兵仿照直隸練軍章程酌添幫帶文案及親兵餘丁雜役一切薪水公費等款從減定擬敬繕清單恭呈

御覽

一各營宜添設幫帶也查直隸練軍章程每營除正營官一員哨弁五員外添設幫帶官一員誠以營伍一切事務較繁營官一員難資稽查必須添設幫帶同心協理庶事可期認真不致顧此失彼此次東省所練馬隊務求切實操練營官一員勢難兼顧茲擬仿照直軍章程派一幫帶俾資協理庶該營官得以收指臂之助至該營營官一員幫帶一員哨弁五員所有應給薪水亦擬照直軍章程

營官每月支薪水銀二十兩幫帶官每月支給銀十五兩
哨弁每員支給銀十兩以爲日用飲食暨餵養馬匹之資
俾免賠累而專責成

一營員宜酌給親兵也查直隸練軍章程營官幫帶均各
給以親兵哨弁均各給以餘丁所以資該營官弁彈壓差
遣之用不致派應操正兵兼充雜役立法至善此次東省
所練馬隊亦擬仿照辦理茲議以營官一員酌給親兵六
名幫帶一員酌給親兵四名哨弁五員各給以餘丁二名
其正兵二百五十名令其專事操練不准擅派差使致令
曠誤至該親兵人等查直軍章程係由營挑用其應給口
分外每月酌加銀一兩已奉部議准給發惟東省現在暫

將馬匹核實開除統計除現調出馬兵五百名外餘均應
留各汛巡緝地方實屬無可挑選惟有月行選擇隨營多
年材勇出衆之弁充當庶該營官等得收差遣之用惟月
募充當親兵餘丁之弁勇既無底餽練餽可支又不能照
正兵給予口分不得不變通辦理擬請每名每月支給銀
四兩以資養贍與直省挑選額兵所領口分亦相符合

一馬兵宜酌給餘丁也查直隸練軍章程每隊正兵二十
五名酌給餘丁三名每名月支餽銀一兩五錢等因查東
省此次所練馬隊以正兵二百五十名爲一營每營共計
五哨每哨共計五十名茲擬仿照直隸章程每哨給予餘
丁六名每營共計餘丁三十名專爲正兵看棚炊爨之用

庶正兵得以專心操練惟馬隊餘丁必須年富力強方能
隨同馬隊奔馳往來迥非步隊長夫可比如每月支銀一
兩五錢每日實得銀五分當此糧價昂貴之時實屬不敷
食用今擬馬隊餘丁酌照步勇口分每月支給口糧銀三
兩以免枵腹惟較之直軍支餘丁口糧章程似覺稍多然
直省練兵多係步隊此次所練專係馬隊其奔馳有勞逸
之殊故口糧亦須稍示區別並不敢略滋浮冒

一文案宜派員管理也查調練官兵原非勇營可比卽如
兵丁遇有事故及技藝不能精進撤令歸伍另調補額或
另募承充以及口糧截扣建曠等項情事必須通報臣暨
藩司衙門並知會底營及軍需局知照案牘既屬紛煩款

目又多軫轡茲擬仿照直軍章程每營專派文員一員總司其事並照章每員給以書手二名聽差二名至營中應用醫生獸醫工匠人等實爲必不可少之需亦應照章辦理茲擬每營酌給醫生一名獸醫一名各藝工匠四名其應給薪水工食擬請照章文案委員支給薪水銀十二兩文案書手每名月支工食銀三兩五錢醫生獸醫各工食銀四兩聽差每名月支銀二兩其工匠人役較之直軍定章裁減二名以示節省

一運送宜酌給車輛也查直隸練軍章程每隊正兵二十五名給餘丁三名專爲看棚炊爨之用所有應用火藥鉛丸器械等件必須隨隊運送查直隸有奏定長車二百輛

東省並無長車馬隊騁馳既速且急動輒百餘里或數百里不等遇有調撥尤爲刻不可緩若不預備長車逐日餵養必致臨時無從雇覓應請每哨給予長車一輛專資運送庶免貽誤查東省定章每車一輛每百里正價銀一兩幫價銀六錢此項長車自應變通辦理不論里數多寡每輛每日從減給銀一兩統作正銷銀數既較直省減少而兩營僅給長車十輛亦均歸實用略無浮冒

一營中宜酌給公費也查直隸練軍章程自管帶官以下每營每月計合公費銀六十兩等因山東邇來麩草料價值昂貴兼之馬匹須用籠頭鐵轡韁繩及修補鞍轡釘掌藥餌等項以及每夜所需油燭種種浩繁該官兵等勢難

賠墊應請仿照直隸練軍章程按月支給公費銀六十兩以資應用

一軍械宜酌量添置也查現在所調各營馬兵隨帶馬槍號帽號衣腰牌鞍韉除原營帶來實堪應用不計外其不敷之件及火藥鉛丸號帽號衣等件擬請仿照直軍章程隨時由臣派員採辦製造撙節撥用核實造報以杜浮冒

馬隊津貼免扣二成片

同治九年二月三十日

再正繕摺間接准兵部咨覆臣前奏酌加馬隊津貼一節經戶部議令仍照東省兵饒舊章概以八成實銀折給每兵月加實銀九錢六分馬每匹月加實銀一兩六錢八分庶於體恤之中兼示撙節之意等因具奏奉

旨依議欽此行知到

臣

自應欽遵辦理惟查

臣

前次奏請

酌加津貼每兵一名月支津貼銀一兩二錢馬一匹月支津貼銀二兩一錢誠以此次操練馬兵均係調離原營編隊合操其一切日用所需不比在底營中有家室相依可以借資津貼卽其操練之法除每日三次乘騎正操外尙須練習步下雜技計每日幾無暇時又不比在底營中除

照例操演外尙有餘日可以謀生且近年東省各屬收成歉薄一應米麵食用及馬匹餵養之芻豆等項價值較昂而兵丁紮營之處尤屬異常昂貴若非寬爲給發勢必枵腹堪虞是以酌議津貼一款從實支給以期飽騰況臣此次所擬練兵章程俱係仿照直隸練軍奏准定章酌辦查直隸練軍章程每馬兵正兵一名月加餽銀五兩合之月支底餽七成實銀一兩五錢計每兵一名每月共得實銀六兩五錢今東省每兵一名加銀一兩二錢馬一匹加銀二兩一錢共計銀三兩三錢再加之每名每月應領除扣朋減成底餽銀一兩五錢二分底乾銀七錢二分合計統共每正兵一名每月祇得實銀五兩五錢四分較之直省

尤爲節省至直省章程馬兵底乾七錢二分一款係由藩司坐扣今東省係一併支給雖微有不同然東省加饒較少卽連底乾併計較之直省每正兵一名已核減銀九錢六分若再將底乾七錢二分扣存是每兵每月僅得銀四兩八錢二分更屬不敷食用再四思維實屬難於再減茲部臣議以津貼一層仍照兵饒舊章以八折支給實爲慎重庫款恪守定章以免歧異用意極爲周密然而事值其難亦不得不稍爲變通俾收實用臣擬將各該馬兵應領每月饒乾仍由藩司照章扣成減平核發其餘每月應加每兵月支津貼銀一兩二錢馬每匹月支津貼銀二兩一錢應仍以實銀發給免扣折二成如此區別辦理則合每

兵每月所得全饌而計既較直軍章程已爲節省而於本省發饌舊章亦不致稍有違背且使各馬兵等稍爲足用自可益加督責令其專力操練不致有所藉口實於練兵有裨

臣爲整飭營伍起見謹附片陳懇伏乞
聖鑒訓示謹

奏

增建號舍添設房考摺

同治九年五月二十九日

奏爲山東鄉試人數衆多現在增建號舍並懇添設房官恭摺奏祈

聖鑒事竊查齊魯爲文物之邦考試重賓興大典近年蒙恩加廣學額應試生監日增月盛舊設號舍祇有九千餘間每遇人數加多之年實不敷坐本年舉行庚午正科並補上屆丁卯科兩科併行人數益多而東省十餘年兵燹一旦肅清士子志切觀光尤爲踴躍現查應試之士約計不下一萬二千餘人若俟臨時搭蓋棚號權宜辦理誠恐風雨驟至溼漏堪虞燭炬通宵防範不易兼以衆人統歸一號尤慮百弊叢生

臣

體察情形似未便再事遷就倍形

擁擠卽經飭司籌議拓地增修現據藩司文彬督飭厯城縣在貢院東北水地添建一千五百七十間西北空地添建一千四百三十間共三千間估需銀三千兩有奇由司先行籌款給發趕辦查驗籤椿結實石牆鞏固洵屬一勞永逸之計惟是一場試卷旣有一萬二千有餘之多而分校仍照向章祇設十二房是一房須分閱千餘卷兼以二三場接踵而至爲期旣迫卷數紛煩卽使精明敏捷勢難逐卷逐篇悉心校閱以定去取一經草率從事屈抑必多士子攻苦有年類皆欲續學潛修期於一試設或鑒核未精一朝擯棄殊爲可惜查四川省甲子科奏請添設房官本年湖北亦因增修號舍奏准添房均有成案東省事同

一律合無籲懇

天恩俯准將山東鄉試同考官添爲十四房俾分校者從容蒐討精力不致疲乏庶鑒別不爽得以識拔眞才仰副聖主闢門籲俊之至意除咨部查照外所有增建號舍懇添房官緣由理合恭摺具奏再鄉試之年例不得條陳科場事件惟軍務乍平人數能否加增一時難以早定且添修號舍並無閒款可挪能否籌辦亦未敢必現在人數益多而號舍又經告成始議增設房考是以核辦稍遲至此事無關弊竇與尋常更改章程不同用敢援案辦理又學臣于建章現在丁憂經臣暫行兼理應毋庸會銜合併陳明伏乞

皇太后

皇上聖鑒訓示謹

奏

密陳海口防務暨籌備北路情形摺

同治九年七月十九日

奏爲遵

旨密籌海口防務及現在揀派驍勇可恃之將添練兵勇十二營以備調撥恭摺密陳仰祈

聖鑒事竊臣於同治九年六月二十九日七月十六日迭

次欽奉

密諭以天津民教啟衅令於各口岸嚴密設防所有沿海水陸官兵力加整頓並著將現辦情形詳細具奏等因欽此又於九年七月初五日欽奉

上諭令遴選久經戰陣之員各帶勁旅隨時訓練聽候調撥等因欽此跪誦之下仰見我

皇上宸謨廣運欽服莫名伏查天津一案當滋事之始

臣

確訪情形深慮辦理之極爲棘手緣民教均有各不相下之勢畸輕畸重皆易激起爭端雖在我決不可輕言用兵而事變之來恆恐出諸意外是以預防之道不可不密爲講求臣當於六月中先已函致登州鎮總兵陳擇輔以查詢營伍爲辭令其來省與之熟計海口形勢密謀布置並密函切囑登萊青道劉達善令其於煙臺各洋行加意拊循如有假借津事造言惑衆者立即拏究以安洋人之心一面仍將海口暗爲體查情形並煙臺洋人有何舉動飛速密稟以憑覈辦茲欽奉

密諭飭辦

臣

自當不動聲色悉心妥籌惟查東省海面自

日照縣之濤雒口與江蘇交界起至海豐縣之大沽河口與直隸交界止中分爲東南北三洋每洋相距約四五百里不等統計洋面約一千四百餘里其間島嶼海口大小統計二百數十處道里頗形寥遠若使處處布防不惟無此兵力且勢分力弱亦不足以資堵禦臣詳細審度惟有擇要設防查文登縣屬之馬頭背石島福山縣屬之煙臺蓬萊縣屬之廟島掖縣屬之小石島五處係洋船所必經之道現擬於此處酌定設防此外若文登之鐵槎山榮成之成山兩處爲洋船駛行東洋標準而成山一處地勢險要船行必需開避亦擬於兩處酌定每處各屯紮三四百人徧插旗幟多設礮位以作疑兵而資鎮懾至於分布應

需兵數馬頭背石島兩處共須防兵一千四五百人煙臺
及蓬萊縣廟島兩處最爲緊要每處必須防兵二千五六
百人掖縣之小石島一處亦須防兵一千二三百人合計
五處及鐵槎山成山兩處共須防兵六千數百人始敷布
置復查登鎮所轄水陸各營除出師裁撤外實存兵丁三
千六百九十餘名以之分防各島口實不敷兵三千餘人
臣擬將來設防之時酌定以記名提督現署臣標中軍參
將莫組紳所帶勇丁二營合之如不足用擬在煙臺將福
建廣東向在該處游散之徒招募二三營嚴行約束俾爲
我用一可以杜洋人勾結漢奸之謀一可以靖內地藉端
肆擾之害惟是布置雖定而津事並未稍形決裂雖該洋

人時以兵船要挾究未顯露痕迹此時辦理海防亦祇可暗地規畫定局待時而動萬不能遽行調派轉令該洋人得以藉口

臣刻惟懷遵

聖訓將沿海水陸各官兵加意整頓現已嚴飭各將弁令其於各營兵丁揀選足數勤加操練決不明言設防之事以示鎮靜萬一日後有警調撥亦甚便捷此

臣

現在籌辦

海口之情形也抑

臣

竊有說者此次天津民教滋事僅係法國而不及各國僅係教堂而不及通商以目前情勢論之法國重傳教而各國重通商若一經用兵於通商各國必多不利洋人惟利是圖似不肯以彼累此故用兵一層將來或不至此所慮法使羅淑亞遇事任性躁急妄爲則

防之自應嚴密然事機如果決裂臣以爲沿海各口之防
尚可緩圖而大沽北塘等處

京師最要門戶急當層層布置但使兵勇得力不令洋人
得以登岸彼亦無計可施臣目前雖將沿海防務規畫粗
定而根本重地刻難去懷現已將王正起所帶之振字四
營王心安所帶之東治二營均調附近直隸之德州陵縣
分地駐紮令其巡防邊境逐日操練設使事機有急卽當
親率北行期於迅速以固根本惟慮王正起所帶僅四營
王心安所帶僅二營人數太單設遇大敵戰守均難自成
一隊臣不得已復令其將各該營前次遣撤得力舊部選
募十二營分帶訓練如一旦事變猝來卽可獨當一面力

遇狂氛而於本省海口分布防兵亦不必從中抽調似於
內外均尙有裨所有密籌海口及籌備北路各情形愚昧
之見是否有當謹由驛五百里恭摺具陳伏乞

皇太后

皇上聖鑒訓示謹

奏

請優卹惠慶摺

同治九年七月三十日

奏爲知府立功後積勞病故仰懇

天恩俯准優卹以昭激勸恭摺仰祈

聖鑒事竊照近年軍興以來凡在軍營文武大員著立功績積勞身故者經中外臣工據實奏請莫不蒙

恩分別予卹所以發臣節而勵戎行至優極渥茲查有鹽運使銜補用道曹州府知府惠慶從前服官湘省卽在軍營當差臣於同治二年升任山東臬司時東省軍務喫緊濟東兗沂各府均係賊蹤奉

諭勦辦因在湖南奏調管帶濟安營勇隊隨同來東該員督飭營哨約束勇丁沿途極爲整肅是年五月到東臣督

兵協勦宋景詩股匪駐軍堂邑因該逆被勦窮竄恐其潛
撲東昌密派該員親率精騎由間道星夜抄出賊前適遇
賊於新集奮勇截擊旋會合親王僧格林沁大隊竭力追
勦歷兩晝夜並未稍息遂將逆匪斬獲殆盡宋逆隻身撲
河免脫賊股以平嗣臣升任藩司督軍往來截勦捻逆四
年四月遏賊於滕縣臨城驛該逆全股撲壓勢甚鴟張臣
派該員分隊抄擊以千餘之衆當數萬之賊短兵鏖戰斃
賊極多未嘗少挫六年臣升任巡撫統籌防勦因東省向
少馬隊不利追賊奏明赴吉林黑龍江招募丹丁特派該
員前往長途往返一萬數千里行程迅速馬匹略無傷耗
皆該員照料得宜抵東後臣復飭其管帶上緊訓練卽派

令前敵助勦七年二月捻逆張總愚北竄大股由阜城一路圖竄天津該員卽帶馬隊一千五百名由景州連夜疾馳迎頭截擊賊被勦南奔以後不敢由此路再窺津郡其東北一路克以保全者實該員之力居多約計該員自到東以後無日不身在行間當攻戰追勦喫緊之際往往馳驅經數晝夜不遑寢食其勞績最著受病卽因此而深故該員年甫逾四十已患氣喘之症七年凱撤後委署萊州府事旋題補曹州府知府飭令到任該員抵曹以後因地處邊防民情極爲强悍雖境內漸就平靜而伏莽時虞竊發遇事力求整頓一切案牘事事躬親臣又抽撥曹標官兵令其訓練以資巡緝本年四月臣查閱營伍道出曹州

適該員喘症大發幾於不起甫愈數日卽照舊力疾辦事
略不稍圖安息臣見其神氣甚弱囑以勉自節勞兩月以
來時接該員稟辦地方情形頗有起色正望其保障西南
忽據荷澤縣稟報該員於七月初五日身故其前一日猶
坐大堂審理民詞不輟等情臣聞信之下不勝痛悼查該
員隨臣來東時閱八載精細樸誠廉明勤幹實堪大用之
才是以上年具摺密陳以備

錄用乃以積勞過甚又復力疾從公遂致一病不起現該
員並無子息身故以後據荷澤縣稟稱一無所有景況蕭
條尤可憫惻合無籲懇

天恩俯准將鹽運使銜補用道曹州府知府惠慶

敕部照軍營立功後積勞病故例從優議卹以獎盡勞而
昭激勸出自

逾格鴻慈謹恭摺具陳伏乞

皇太后

皇上聖鑒訓示施行謹

奏

馬兵章程仍照原議辦理摺

同治九年十月三十日

奏爲東省抽練綠營馬兵章程經部核議裁減謹縷陳實在情形籲懇

天恩仍准照原議辦理以收實效恭摺仰祈

聖鑒事竊臣於本年二月以東省抽練綠營馬兵應設營哨官弁並酌添幫帶文案及親兵餘丁雜役一切薪水公費軍裝車價等款仿照直隸練軍章程酌減定擬敬繕清單恭摺具奏三月二十五日奉

旨該部知道單併發欽此嗣准戶部來咨令將前項馬隊抽調營分花名及底饌津貼起止日期詳晰造冊專案報查並以每營營官幫帶官哨弁及總司文職月給薪水暨

書手聽差醫生獸醫各藝工匠月支工食同每營月支公費數目核與直隸章程均屬相符惟直軍每兵五百人爲一營今山東以二百五十名爲一營兵數旣少一半哨官自可酌減不必查照五員且兵少則事務較簡醫生等卽數無可減若書手聽差吏役或照直營減半當亦敷用其月支公費尤應酌減又營官哨弁親兵應照直軍於各標營挑選充補馬兵餘丁月餼亦應刪減又以練兵成效未可驟期調撥不知何日雇用長車並令撤裁等因當經分飭查照去後茲據總理軍需局司道詳稱前擬東省練兵章程各條奉部行令刪減自當遵辦惟念東省界連徐豫壤接燕趙久爲匪徒出沒之區今雖中原底定而散勇餘

匪時時伏莽堪虞武備仍宜講求不容稍緩故上年整頓綠營裁汰老弱標兵一千九百餘名卽奏明抽調精壯額兵添練馬隊兩營於裁兵節餉之中寓思患豫防之道凡練軍用項前已撙節爰籌並無浮濫卽如哨官一條東營兵數雖較直軍有減然東省專練馬隊每營兵數二百五十名加以騎馬二百五十匹卽與五百名一營無異每兵五十名爲一哨每哨設官一員僅以數統率而資彈壓如欲酌減一二員委有照顧難周之慮至書手聽差以數百人之事務祇設吏役各二名分應繕寫遣撥之用尙覺朝夕應接不遑毫無冗濫其每營月支公費銀六十兩營中日用在所必需況馬隊尙有修補鞍韉繩索等費凡茲零

星需用尤較步軍爲繁此所以哨弁等項名目仍擬按照直隸章程辦理請免酌減又營哨官弁親兵飭由東省營汛選丁充補一節惟查東省額兵本與直隸兵數多寡懸殊此次已裁老弱標兵一千九百數十名各營存兵數已無多加以挑選兩營馬隊及登鎮調撥洋槍練軍存營額兵更形單薄山東爲南北衝衢幅員遼闊現存汛兵僅敷分防巡緝若馬隊營哨官弁親兵在於各營汛選丁充補深恐顧此失彼兩無裨益因而不得不另行募充旣須募充則並無底饌可支該兵等月領饌銀爲逐日衣食之資自宜量爲變通仍請月給饌銀四兩俾敷食用又兵之餘丁口糧一款奉部以比較直隸銀數尤多直軍多步隊而

東軍則專練馬隊卽就平日而言其晝夜餵養各兵馬匹及樵汲炊爨之需勤勞已較步軍倍蓰一旦設遇征調與出境巡防隨同奔馳尤難刻緩當此招募之始該丁等月給口糧自應敷其養贍近年東省水旱歉收食物昂貴若照直隸步軍銀數斷不敷爲餬口之需所有前項餘丁口糧應請仍照原議每月給銀三兩以資養贍而廣招徠又兩營預雇長車奉部以練兵成效未可驟期調撥不知何日行令裁撤等因遵查練兵隨時操演原冀刻期可用豈敢任其怠緩至於調撥何時原未可定惟現在馬隊練軍尙非安坐省垣其各隊除操演之外皆每月輪班各處彈壓至搜捕匪類一月或二三次不等凡運送軍裝車輛必

須預行籌備方免貽誤且查直隸練軍營制陸軍准用長車二百輛今山東兩營酌給長車十輛已屬減而又減委難裁撤以上各條均懇仍照原議詳請具奏前來臣查東省抽練馬兵雖係仿照直隸練軍核減之中不無稍有變通之處且兵丁既須操練技藝馳騁馬匹尤須服習陣法止齊其間事務之紛用費之繁實較步隊倍難經理前次所議章程各條實皆務從節省未敢稍涉浮多在部臣酌議減裁原爲慎重饒需起見而細核所指各款實皆必不可少之需該司道等所議經臣詳加查核均係實在情形惟有籲懇

天恩將部議酌令裁減各條仍准均照原請俾得辦理從

容以期實效除咨部外謹恭摺具陳伏乞

皇太后

皇上聖鑒訓示施行謹

奏